

## LET'S DO IT

## VAREŠ

### ZAPISNIK

sa 2. sastanka lokalnog tima

održanog 26.05.2012. u 18,00 sati u kafe baru „Jazz in the house“

#### PRISUTNI:

1. Mirela Erlbek, koordinator;
2. Dalija Velić, zamjenica koordinatora;
3. Davor Barnjak;
4. Emina Šolak;
5. Božidarka Dodik;
6. Katarina Pejčinović;
7. Maja Jačimovska;
8. Katarina Gavran;

Mirela Erlbek je obavijestila prisutne o sastanku koordinatora lokalnih timova održanom u Zenici 23.05.2012. Sve općine u ZDK imaju formirane lokalne timove (osim Žepča), i u svim općinama su nosioci aktivnosti pojedine NVO, osim u Varešu, gdje to čini neformalna grupa građana. Tema razgovora je bilo potpisivanje partnerskih ugovora sa NVO „Ruke“ iz Sarajeva kao nosioca aktivnosti Let's do it BiH. Ugovori se većim dijelom odnose na upravljanje donatorskim sredstvima tj. svi iznosi preko 100 KM bi se uplaćivali na žiro račun NVO „Ruke“ a potom raspoređivali lokalnim timovima na njihov zahtjev i uz predračun troškova.

Na sastanku je posebno bilo riječi o potrebi poduzimanja sigurnosnih mjera prilikom čišćenja deponija (civilna zaštita, zbog mogućnosti postojanja minsko-eksplozivnih sredstava na i oko deponija, policija i zdravstvo).

Također je naglašeno da u akciju ne smiju biti uključene političke stranke, niti se smije promovirati bilo koji politički program, ali su svi članovi i rukovodstva stranaka dobrodošli da kao građani pomognu akciju.

Mirela je također obavijestila tim o sastanku sa načelnikom općine koji podržava akciju i obećao je pomoć općine Vareš koliko to bude moguće. Ponudio je da lokalni tim Let's do it Vareš preuzme jednu od postojećih NVO koja se bavi pitanjima ekologije ali ne radi, kako bi se izbjegli troškovi registracije, i kako bi se

neformalnom pokretu Let's do it Vareš na taj način osigurala potrebna forma s ciljem lakše komunikacije sa donatorima, sponzorima, učesnicima, drugim NVO i pokretom Let's do it na kantonalnom i državnom nivou. Mirela je održala sastanak i sa pomoćnikom načelnika Berberović Rusmirom, te sa komunalnim inspektorom Snježanom Kokor koji su obećali podržati akciju u okviru redovnih poslova koje obavljaju.

Pored toga, ostvaren je kontakt sa medijima (radio Bobovac i list Bobovac), koji su spremni podržati akciju kroz intervju, reklamu, džinglove i novinske članke, a Mirela je obavila i razgovor sa direktoricom vrtića te predstavnikom turističke zajednice Vareš.

Emina Šolak je obavijestila prisutne da je razgovarala sa direktorom Doma zdravlja, te će na dan akcije biti osigurano vozilo hitne pomoći u pripravnosti, kao i zdravstveni radnici na lokacijama koje se budu čistile.

Katarina Pejčinović je razgovarala sa ravnateljicom OŠ Vareš, te je obaviještena da se prezentacije u školama ne mogu održati bez prethodnog odobrenja Ministarstva obrazovanja ZDK ali da postoji mogućnost da se djeci kroz predavanja na temu ekologije, objasne i osnovni ciljevi ove akcije.

Dalija Velić je uradila power point prezentaciju za odrasle, a Jasna Alihodžić i Marko Poljaković prezentaciju za djecu.

Katarina Gavran je o planiranim zadacima obavijestila KES, te su već započeli sa prikupljanjem fotografija divljih deponija. Također, Velimir Gavran posjeduje GPS uređaj koji omogućava elektronsko mapiranje deponija preko „google earth“ te će se na tome raditi u narednom periodu.

Božidarka Dodik je sačinila spisak javnih ustanova i preduzeća, privatnih preduzeća, ugostiteljskih i zanatskih radnji i STR kojima će se dostavljati pozivi za sastanak u junu, s tim da je spisak nepotpun obzirom da nedostaju imena za neke od ovlaštenih osoba kojima će se uputiti pozivi.

U toku sastanka je stigla obavijest da je Dario Dodik očistio divlju deponiju lociranu pored puta Vranjkovci-Pobrin Han, za što mu je bilo potrebno 3 sata i prikolica za odvoz smeća, te će fotografije od „prije“ i „poslije“ biti objavljene u FB grupi, radi daljeg animiranja građana i podizanja svijesti o tome da je akciju moguće provesti uz malo volje, truda i vremena.

Maja Jaćimovska je obavijestila prisutne da je o akciji i njenim ciljevima obavijestila predsjednika Fondacije za obnovu i razvoj regije Vareš, te članove

Upravnog odbora, te je Fondacija spremna da finansijski podrži akciju (troškovi ishrane, goriva i dr.), uz uvijet da se Fondacija medijski promovira tokom provođenja akcije.

Davor Barnjak je predočio 3 prijedloga za logo Let's do it Vareš, nakon čega je većinom glasova odabran slijedeći logo:



U vezi sastanka u općini koji je prvobitno planiran za 05.06.2012., kao Dan okoliša, prisutni su se saglasili da je rok za izvršenje svih planiranih zadataka prekratak i da se datum sastanka treba pomjeriti za sredinu juna 2012.

Nakon diskusije, doneseni su slijedeći zaključci:

1. Mirela će otići kod načelnika općine radi realizacije preuzimanja NVO „Eko-Vareš“, s tim da treba biti postavljena nova rukovodna struktura ukoliko stara nije više zainteresirana za daljnji rad. Prijedlozi su da predsjednik NVO bude Mirela Erlbek, kao koordinator lokalnog tima, potpredsjednik Dalija Velić kao zamjenica koordinatora, sekretar Katarina Pejčinović, a članovi upravnog odbora, postojeći članovi tima Let's do it Vareš , a biće ponuđeno da se uključe još i Selma Hafizović, Lara Brđanović, Marinela Jelić. Obzirom da Božidarka Dodik i Audin Velić zbog nespojivosti s poslom ne mogu biti članovi NVO, oni će svoju podršku

akciji Let's do it Vareš pružati savjetima i sugestijama u vezi sa organizacijom akcije, te neposrednim učešćem u čišćenju deponija. Mirela će kontaktirati i sa JKP Vareš i CZ.

2. Dalija Velić i Davor Barnjak će doraditi prezentaciju tako da bude spremna za sastanak planiran u junu u općini, a trebalo bi uključiti i fotografije očišćene deponije na putu Vranjkovci-Pobrin Han, muzičku podlogu i video klipove (prirodne ljepote Vareša i sl., nasuprot fotografijama divljih deponija) Dramatična muzička podloga treba da prati slike/video-klipove deponija, a relaksirajuća video klipove prirodnih ljepota.
3. Katarina Pejčinović će kontaktirati nastavnike koji će (posebno na časovima biologije) u sklopu predavanja o ekologiji i važnosti očuvanja prirode, objasniti učenicima i osnovne ciljeve akcije Let's do it.
4. Božidarka Dodik će napraviti pozivnice i kompletirati spiskove uzvanica za veliki sastanak u općini, s tim da je potrebno pozvati i predsjednike MZ, direktore škola (obzirom da se neće moći održati prezentacije, a kratak je rok za pribavljanje saglasnosti nadležnog ministarstva), predstavnike vjerskih zajednica, humanitarnih organizacija, NVO, sportskih i kulturnih društava, medija i svih drugih relevantnih tijela. Također će kontaktirati sa NVO „Ruke“ radi pojašnjenja partnerskih ugovora i detaljnijih informacija o budućoj suradnji.
5. Nastavit će se aktivnosti u vezi sa lociranjem deponija, a nakon toga će se evidentirati volonteri koji su zainteresirani za čišćenje pojedinih lokacija. Tamo gdje ne bude interesa, čišćenje se neće ni obavljati, obzirom da je nemoguće organizirati akciju ukoliko na određenom području ne postoji interes građanstva za provođenje akcije.
6. Veliki sastanak u općini održat će se 14.06.2012.g. u 18,00 sati, te do tog vremena treba dobro osmisliti koncepciju sastanka. Prezentator će biti Dalija Velić. Nakon ovog sastanka, potrebno je održati i javnu tribinu za građanstvo, koji će o tome biti obaviješteni putem plakata, letaka i sl.

Donator sastanka: Emina Šolak, piće, 13,50 KM.

Slijedeći sastanak će se održati u subotu, 02.06.2012. u 17,00 sati, na istom mjestu.

Sastanak završen u 18,55 sati.

Vareš, 26.05.2012.

Lokalni tim

Let's do it Vareš